



Broj: 01/1-50-1-13/07
Sarajevo: 14.05.2007.

Z A P I S N I K

sa 13. sjednice Ustavnopravnog povjerenstva

Sjednica je održana 14.05.2007.godine s početkom u 10,00 sati.

Sjednici su nazočili svi članovi Povjerenstva: **Šefik Džaferović, Drago Kalabić, Lazar Prodanović, Halid Genjac, Momčilo Novaković, Ekrem Ajanović, Martin Raguž, Velimir Jukić i Adem Huskić.**

Pored članova povjerenstva sjednici su nazočili: Branka Todorović – Tajnik Zastupničkog doma PSBiH; u ime Vijeća ministara BiH Esma Hadžagić - Ministarstvo civilnih poslova; ispred Visokog sudbenog i tužiteljskog vijeća BiH: Branko Perić – predsjedatelj i Aldijana Porča; Suad Salkić, Alma Smajlović i Gordana Ivanović u ime OESS; Nada Zukić, Maja Ribar i Daria Duilović – OHR; i Jadranka Mikić EC.

Sjednici je bio nazočan Milan Zjajić, koji je obavljao poslove Tajnika Povjerenstva, pripravnik Đenita Pašić zaposlena u Tajništvu PS BiH i student stažista Ajdin Brčaninović.

Sjednica je okončana u 19,00 sati.

Nakon što je Predsjedatelj Povjerenstva predložio dnevni red, član Povjerenstva Lazar Prodanović je istakao da nije dobio sve zapisnike, nakon čega je verificiranje zapisnika odgođeno za narednu sjednicu. Povjerenstvo je jednoglasno prihvatila sljedeći dnevni red:

D N E V N I R E D :

1. Izvješće Viskog sudbenog i tužiteljskog vijeća Bosne i Hercegovine za 2006. godinu;
2. Prijedlog zakona o visokom obrazovanju u BiH, predlagatelj Vijeće ministara BiH, po zaključku Doma sa 5. sjednice od 15.3.2007., odgođeno sa 12.sjednice 27.04.07.;
3. Prijedlog zakona o Agenciji za predškolsko, osnovno i srednje obrazovanje u BiH, predlagatelj Vijeće ministara BiH; odgođeno sa 12.sjednice 27.04.07.;
4. Ostala pitanja.

Ad. 1. Izvješće Viskog sudbenog i tužiteljskog vijeća Bosne i Hercegovine za 2006. godinu;

Nakon provedene rasprave u kojoj su učestvovali svi članovi Povjerenstva i Predsjedatelj Visokog sudbenog i tužiteljskog vijeća BiH, Povjerenstvo je:

- a) konstatiralo da je Izvješće metodološki dobro urađeno te da može služiti kao osnov za daljnje korake koje trebaju poduzimati ostala tijela u reformi pravosuđa;
- b) u skladu sa Zakonom o Visokom sudbenom i tužiteljskom vijeću Bosne i Hercegovine. ("Službeni glasnik BiH", broj 25/04 i 93/05) prima izvješće k znanju te to isto predlaže i Zastupničkom domu Parlamentarne skupštine Bosne i Hercegovine;
- c) naglašava posebnu pažnju na suradnju Zastupničkog doma Parlamentarne skupštine Bosne i Hercegovine i Visokog sudbenog i tužiteljskog vijeća BiH u cilju jačanja uloge Visokog sudbenog i tužiteljskog Vijeća kao odgovornog tijela u osiguranju principa neovisnosti i odgovornosti pravosuđa u BiH.

Ad. 2. Prijedlog zakona o visokom obrazovanju u BiH, predlagatelj Vijeće ministara BiH, po zaključku Doma sa 5. sjednice od 15.3.2007., odgođeno sa 12.sjednice 27.04.07.;

Povjerenstvo je vodilo iscrpnu i dugotrajnu raspravu o ulozenim amandmanima te je konstatiralo da su amandmane uložili Selim Bešlagić, Drago Kalabić, Martin Raguž i Šefik Džaferović. Prilikom glasovanja Martin Raguž i Drago Kalabić su odustajali od nekih amandmana, a neke su modificirali.

Nakon provedenog glasovanja Povjerenstvo je usvojilo sljedeće amandmane:

AMANDMAN I

Naziv zakona treba da glasi: „OKVIRNI ZAKON O VISOKOM OBRAZOVANJU U BOSNI I HERCEGOVINI“

AMANDMAN II

U članku 4., iza stavka 1. dodaje se stavak 2. koji glasi:

“Visoko obrazovanje se temelji na:

- akademskim slobodama, akademskoj samoupravi i autonomiji sveučilišta,
- otvorenosti sveučilišta prema javnosti, građanima i lokalnoj zajednici,
- nedjeljivosti nastavnog rada i naučnog istraživanja, odnosno umjetničkog stvaralaštva,
- uvažavanje evropskih humanističkih, demokratskih vrijednosti, te usklađivanja sa evropskim sistemom visokog obrazovanja,
- poštovanje ljudskih prava i građanskih sloboda, uključujući zabranu svih vidova diskriminacije,
- konceptu cjeloživotnog obrazovanja,
- interakciji sa društvenom zajednicom i obavezi sveučilišta da razviju društvenu odgovornost studenata i drugih članova akademske zajednice”.

AMANDMAN III

U članku 10. u stavku 1. alineja 2. mijenja se i glasi:

"- odnosi se na visokoškolsku ustanovu koja realizira najmanje pet različitih studijskih programa iz najmanje tri znanstvene oblasti - prirodne nauke, tehničke nauke, biomedicina i zdravstvo, biotehničke nauke, društvene nauke i humanističke nauke.

Alineja 4. mijenja se i glasi:

“ – odnosi se na visokoškolsku ustanovu koja realizira najmanje jedan studijski program iz jedne naučne oblasti i ispunjava druge uvjete u skladu sa zakonom”.

AMANDMAN IV

U članku 19. stavak 1. dodaje se alineja koja glasi:

- sklapa ugovorne odnose s privrednim subjektima o javno-privatnom partnerstvu.

AMANDMAN V

U članku 21. dodaje se stavak 3. koji glasi:

"Naučnoistraživački rad na visokoškolskim ustanovama može se sufinansirati iz sredstava Budžeta institucija BiH i međunarodnih obaveza BiH, u skladu sa važećim propisima na državnom nivou."

AMANDMAN VI

Zadnja alineja članka 45. mijenja se i glasi;

" U skladu sa Lisabonskom konvencijom i njenim pratećim dokumentima, donosi preporuke nadležnim obrazovnim vlastima u entitetima, kantonima i Brčko Distriktu BiH o priznavanju diploma stečenih van BiH sa ciljem zaposlenja, nastavka obrazovanja i ostavriavanja drugih prava koja proističu iz stečene kvalifikacije."

AMANDMAN VII

Članak 48. mijenja se i glasi:

"Članak 48.

Agencija je nadležna da:

- utvrđuje jasne, transparentne i pristupačne kriterije za akreditaciju visokoškolskih ustanova i donosi norme kojima se određuju minimalni standardi u oblasti visokog obrazovanja;
- utvrđuje kriterije za izbor domaćih i međunarodnih stručnjaka koji obavljaju ocjenu i reviziju kvaliteta i koji daju preporuke o akreditaciji visokoškolskih ustanova;
- preporučuje kriterije i standarde nadležnim obrazovnim vlastima u entitetima, kantonima i Brčko Distriktu BiH za osnivanje i zatvaranje visokoškolskih ustanova, te za prestruktuiranje studijskih programa;
- preporučuje kriterije za licenciranje visokoškolskih ustanova i studijskih programa;
- daje preporuke o najnižim školarinama za sve studente na akreditovanim visokoškolskim ustanovama, s ciljem da najniže školarine budu usklađene u cijeloj BiH;
- pruža savjete o politici rada i razvitka nadležnim obrazovnim vlastima u entitetima, kantonima i Brčko Distriktu BiH;
- daje savjete i informacije o pitanjima unutar svoje nadležnosti zainteresovanim strankama;
- utvrđuje standarde kvaliteta, analizira kvalitet, daje preporuke za otklanjanje nedostataka kvaliteta studija i visokoškolskih ustanova;

- predstavlja BiH u međunarodnim organizacijama za kvalitet u visokom obrazovanju;
- predlaže opće smjernice i kriterije na osnovu kojih se iz Budžeta institucija BiH mogu dodjeljivati sredstva visokoškolskim ustanovama za naučnoistraživački rad;
- donosi pravilnike i druge akte iz svoje nadležnosti."

AMANDMAN VIII

Nadnaslov i članak 49. mijenjaju se i glase:

"4.1. Akreditiranje visokoškolskih ustanova

Članak 49.

U oblasti akreditiranja Agencija je nadležna da:

- raspisuje javni konkurs za izbor domaćih i međunarodnih eksperata za ocjenjivanje i reviziju kvaliteta i davanje preporuka o akreditaciji visokoškolskih ustanova, odnosno njihovih studijskih programa (dalje: eksperti);
- formira Povjerenstvo za utvrđivanje liste eksperata koji zadovoljavaju kriterije iz članka 48. alineja 2. ovog zakona. Povjerenstvo ima pet članova, a čini je po jedan predstavnik Rektorske konferencije BiH, jednog kantonalnog i oba entitetska ministarstava nadležna za obrazovanje, te predstavnik Agencije;
- utvrđenu listu eksperata dostavi na usvajanje svim ministarstvima obrazovanja u BiH i nadležnom odjelu Brčko Distrikta BiH;
- na osnovu prijedloga nadležnih obrazovnih vlasti u pogledu izbora eksperata sa utvrđene liste eksperata, imenuje ekspertska Povjerenstva;
- na osnovu mišljenja ekspertske Povjerenstva daje preporuku nadležnim obrazovnim vlastima o akreditaciji visokoškolske ustanove, odnosno studijskog programa;
- postupak i rješenje o akreditaciji i licenciranju visokoškolskih ustanova donose nadležne obrazovne vlasti u entitetima, kantonima i Brčko Distrikta BiH u skladu sa alinejom 1. članka 48. ovog zakona.
- ocjenjuje usklađenost rješenja o akreditaciji sa normama i kriterijumima iz članka 48. alineja jedan ovog zakona i u slučaju utvrđene neusklađenosti daje preporuku Upravnom odboru za preduzimanje daljih mjera, sve do mjere poništenja rješenja o akreditaciji. Žalbu na rješenje o poništenju rješenja o akreditaciji nadležne obrazovne vlasti podnose Upravnom odboru Agencije;
- vodi državni registar akreditovanih visokoškolskih ustanova;
- listu akreditovanih visokoškolskih ustanova u BiH drži stalno na svojoj internet stranici i objavljuje je najmanje jednom godišnje u "Službenom glasniku BiH", a najmanje dva puta godišnje u tri visokotiražne dnevne novine."

AMANDMAN IX

Nadnaslov i članak 50. se mijenjaju i glase:

" 4.2. Forma i sadržaj diplome i dodatak diplomi

Članak 50.

Agencija donosi uputstvo sa obrascima o formi i sadržaju diplome i dodatka diplome koju izdaju akreditirane visokoškolske ustanove“.

AMANDMAN X

Članak 51. se briše, a numeracija članaka koji slijede se mijenja, prilagođava ovoj promjeni.

AMANDMAN XI

U članku 52. stavku 4. riječi: “Upravni odbor Agencije” mijenjaju se riječima: “Vijeće ministara BiH”

U stavku 9. riječi "biraju se" mijenjaju se riječima: "bira Parlamentarna skupština BiH"

U stavku 10. riječi "jedna trećina" mijenjaju se riječima: "dvije trećine"

AMANDMAN XII

U članku 61. u stavku 3. riječi: " najkasnije do 1.10.2006. godine" mijenjaju riječima: "u roku od jedne godine od stupanja na snagu ovog zakona."

AMANDMAN XIII

Članak 62. mijenja se i glasi:

"Postojeće visokoškolske ustanove stupanjem na snagu ovog zakona dobijaju privremenu akreditaciju od nadležne institucije. U privremenoj akreditaciji određuje se u kom roku će se obaviti akreditiranje svakog od pojedinih programa koji se izučavaju na tim visokoškolskim ustanovama, a u skladu s kriterijumima i procedurama akreditiranja i standardima.

Akreditiranje visokoškolskih ustanova obaviće se u periodu od najviše dvije godine od dana stupanja na snagu ovog zakona."

AMANDMAN XIV

U članku 65. u stavku 1. riječi: "do početka 2006/2007 akademske godine" se mijenjaju riječima: "u roku od 90 dana od dana stupanja na snagu ovog zakona."

* * *

Zatim je Povjerenstvo sa četiri glasa "za", bez glasova "protiv" i sa pet "uzdržanih", prostom većinom usvojila Prijedlog zakona o visokom obrazovanju u Bosni i Hercegovini sa usvojenim amandmanima

Povjerenstvo je konstatovalo da je predloženi zakon neophodno donijeti.

Ad. 3. Prijedlog zakona o Agenciji za predškolsko, osnovno i srednje obrazovanje u BiH, predlagatelj Vijeće ministara BiH, odgođeno sa 12.sjednice 27.04.07.;

Glasovanjem je odlučeno da se ova točka dnevnog reda odgodi za sljedeću sjednicu.

Ad. 4. Ostala pitanja.

Kako nije bilo drugih pitanja po ovoj točki dnevnog reda predsjedatelj je u 19,00 sati zaključio 13. sjednicu.

TAJNIK POVJERENSTVA
Milan Zjajić

PREDSJEDATELJ POVJERENSTVA
Šefik Džaferović